

10 JUL 2003

MULTAQA: ADA ANASIR CUBA NAFI USAHA KERAJAAN MAJUKAN ISLAM - ABDUL HAMID

PUTRAJAYA, 10 Julai (Bernama) -- Usaha kerajaan Malaysia untuk menguatkan negara dan ummah berdasarkan ajaran Islam yang sebenar kini cuba dinafikan oleh unsur-unsur yang mempunyai kepentingan tertentu, kata Pengerusi Jawatankuasa Induk Multaqa Ulama Sedunia Tan Sri Abdul Hamid Othman.

"Mereka berpegang kepada tafsiran-tafsiran yang tidak sesuai dengan keadaan dan situasi semasa," katanya semasa menyampaikan ucapan aluan pada multaqa itu yang dirasmikan Perdana Menteri Datuk Seri Dr Mahathir Mohamad hari ini.

Abdul Hamid, yang juga Penasihat Agama kepada Perdana Menteri, berkata dalam suasana itulah multaqa, yang dihadiri kira-kira 900 peserta termasuk 85 ulama dan cendekiawan Islam dari luar negara, dapat membantu menyelesaikan permasalahan umat Islam berdasarkan ajaran sebenar Islam.

Berdasarkan tradisi zaman pemerintahan Islam, katanya ulama dan ahli fikir sering dijemput untuk membincangkan perkara-perkara yang menyentuh kepentingan umat islam.

Beliau berkata penyertaan ulama-ulama termasuk Imam Besar Al-Azhar Dr Muhammad Sayyid Tantawi akan memberi semangat kepada para peserta multaqa itu dan dunia Islam dalam menghadapi cabaran dan berusaha mengembalikan maruah dan kehormatan ummah.

Multaqa tiga hari anjuran Jabatan itu Perdana Menteri itu antara lain akan membincangkan isu-isu penting membabitkan masa depan umat Islam.

-- BERNAMA

HM AZZ NAK